

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

IZVJEŠTAJ
O RADU KONKURENCIJSKOG VIJEĆA

01.01.2006. - 31.12.2006.

Sarajevo, februar 2007. godine

SADRŽAJ

| | Strana |
|------------------------------------------------------------------------------------|---------------|
| Predgovor | 3 |
| 1. Uvod | 3 |
| 2. Pravni okvir zaštite tržišne konkurencije u Bosni i Hercegovini | 4 |
| 2.1. Zakon o konkurenciji | 4 |
| 2.2. Podzakonski akti | 4 |
| 2.3. Interni akti | 5 |
| 3. Unutrašnja organizacija i sistematizacija Konkurencijskog vijeća | 5 |
| 3.1. Članovi Konkurencijskog vijeća | 6 |
| 3.2. Stručna služba Konkurencijskog vijeća | 6 |
| 4. Budžet Konkurencijskog vijeća | 6 |
| 4.1. Radni prostor Konkurencijskog vijeća | 7 |
| 4.2. Nabavka tehničke opreme | 7 |
| 4.3. Administrativne takse i novčane kazne | 7 |
| 5. Osnovne aktivnosti Konkurencijskog vijeća | 8 |
| 5.1. Zabranjeni sporazumi privrednih subjekata Zloupotreba dominantnog položaja | 8 |
| 5.2. Koncentracija privrednih subjekata | 9 |
| 5.3. Predmeti u postupku | 11 |
| 5.4. Stručna mišljenja | 11 |
| 5.5. Ostalo | 12 |
| 6. Ostale aktivnosti Konkurencijskog vijeća | 13 |
| 6.1. Promotivne aktivnosti - program «Competition Advocacy» | 13 |
| 6.2. Saradnja s međunarodnim institucijama i organizacijama | 14 |
| 6.3. Saradnja s domaćim tijelima i institucijama | 14 |
| 6.4. Obrazovanje zaposlenih u Konkurencijskom vijeću | 14 |
| 7. Zaključak | 16 |

Predgovor

Izveštaj o radu sadrži pregled rada i djelovanja Konkurencijskog vijeća u period od 01. januara 2006. godine do 31. decembra 2006. godine. Ovaj Izveštaj je urađen prema metodologiji koja se primjenjuje u tijelima za konkurenciju zemalja Evropske unije i zemalja regiona.

Predmetni period su obilježile aktivnosti na uspostavljanju pravnog okvira u oblasti tržišne konkurencije, institucionalno organizovanje, interno i eksterno obrazovanje zaposlenih, kao i usklađivanje prakse i djelovanja Konkurencijskog vijeća s načelima moderne tržišne konkurencije.

Također, u ovom period su nastavljene aktivnosti na promovisanju tržišne konkurencije putem programa "competition advocacy" s ciljem podizanja nivoa svijesti i znanja te informiranosti poduzetnika, potrošača, vladinih i ostalih državnih tijela, pravosuđa te šire javnosti o važnosti i ulozi politike i prava tržišne konkurencije za daljnji razvitak tržišne privrede u našoj zemlji.

Predmetni Izveštaj karakterizira značajno povećanje broja zaprimljenih i obrađenih predmeta iz različitih segmenata privrede (bankarstvo, industrija, osiguranje, TV mediji, komunalne djelatnosti itd.), kao i povećanje zahtjeva za izdavanjem stručnog mišljenja.

1. Uvod

Konkurencijsko vijeće, u okviru nadležnosti koje su mu date Zakonom o konkurenciji, je usmjereno na stvaranje okruženja u kojem se paralelno s procesom liberalizacije i otvaranja tržišta, odvija i proces uspostave djelotvorne tržišne konkurencije.

Bosna i Hercegovina ne može uspješno i djelotvorno funkcionirati bez propisa iz područja tržišne konkurencije kao jednog od temeljnih mehanizama moderne tržišne privrede. Značajan uticaj prava tržišne konkurencije za privredni razvoj je potvrđen u praksi zemalja Evropske unije, kao i tranzicijskih zemalja. Propisi iz područja zaštite tržišne konkurencije, odnosno njihova djelotvorna provedba, su uslov optimalne alokacije resursa i eliminiranja extra profita koji nije rezultat uspješnosti poslovanja privrednih subjekata, već njihovog povlaštenog položaja na tržištu. Pravo i politika tržišne konkurencije, ali još važnije njihova djelotvorna provedba, kao jedan od odlučujućih faktora privrednog rasta, ne razvijaju se automatizmom, opredjeljenjem države za tržišnu privredu, već je neophodno definirati i odgovarajuće mehanizme i instrumente zaštite tržišne konkurencije razvijanjem djelotvornosti i konkurentnosti radi zaštite interesa samih privrednih subjekata, ali i zaštite interesa potrošača.

Konkurencijsko vijeće nastoji osigurati privrednim subjektima ravopravne tržišne uslove, jer samo na takvim tržištima na kojima postoji tržišna konkurencija "pobjeđuju" oni najuspješniji i najefikasniji, a to se pokazuje kroz veću ponudu, kvalitet i nižu cijenu njihovih proizvoda odnosno usluga. Na taj način profitiraju potrošači koji dobivaju mogućnost izbora između većeg spektra ponuđenih proizvoda i usluga od većeg broja ponuđača, po cijenama i kvaliteti koja zadovoljava njihove potrebe.

U tom smislu, Konkurencijsko vijeće djeluje na sprječavanju mjera i postupaka koje određene privredne subjekte mogu dovesti u položaj neopravdano povoljniji u odnosu na druge, i na taj način ugrožavaju tržišnu konkurenciju među privrednim subjektima. Politika zaštite tržišne konkurencije Konkurencijskog vijeća je usmjerena prema stvaranju uslova za smanjivanje prepreka razvoju privrede i daljnjoj liberalizaciju tržišta koja su tradicionalno bila zatvorena za konkurenciju (telekomunikacije, energetika, promet i dr.).

Konkurencijsko vijeće u oblasti tržišne konkurencije djeluje na dosljednom provođenju Zakona o konkurenciji posebno na sprječavanju netržišnog ponašanja privrednih subjekata, koje se pokazuje kroz sklapanje zabranjenih ugovora /sporazuma (kartelnih sporazuma), kontrolu koncentracija, kao i drugih postupanja koja kao cilj ili posljedicu imaju sprječavanje, ograničavanje ili narušavanje tržišne konkurencije. Također, Konkurencijsko vijeće poduzima mjere na sprječavanju zloupotrebe dominantnog položaja privrednih subjekata /državnih tijela koje imaju za cilj uklanjanje konkurenata s tržišta.

2. Pravni okvir zaštite tržišne konkurencije u Bosni i Hercegovini

2.1. Zakon o konkurenciji

Stupanjem na snagu Zakona o konkurenciji propisi o zaštiti tržišne konkurencije u velikoj mjeri su usklađeni odnosno harmonizirani s pravnim naslijeđem EZ-a (Evropske zajednice), prije svega s članom 81. Ugovora o osnivanju Evropske zajednice, kojim se uređuje područje zabranjenih sporazuma između poduzetnika i mogućnosti izuzeća od takve zabrane, članom 82. kojim se uređuje područje zloupotreba dominantnog položaja privrednih subjekata na tržištu, te sekundarnom regulativom (donesenom u 2003. i 2004. godini) kojom se uređuje, između ostaloga, primjena prava tržišne konkurencije na pravne ili fizičke osobe koje obavljaju djelatnosti od posebnog interesa i slično.

Zakonom o konkurenciji (Sl. glasnik BiH, broj 48/05) su uređena pravila, mjere i postupci zaštite tržišne konkurencije, nadležnosti i način rada Konkurencijskog vijeća na zaštiti i promociji tržišne konkurencije u Bosni i Hercegovini. Zakon o konkurenciji se primjenjuje na sva pravna i fizička lica koja posredno ili neposredno sudjeluju u prometu roba i usluga i koja svojim djelovanjem sprječavaju, ograničavaju ili narušavaju tržišnu konkurenciju na cijeloj teritoriji Bosne i Hercegovine ili značajnijem dijelu tržišta.

Konkurencijsko vijeće kontinuirano radi na pravnom okviru svog djelovanja predlaganjem novih propisa što omogućava viši nivo zaštite tržišne konkurencije u Bosni i Hercegovini. U poboljšavanju primjene donesenih propisa Konkurencijsko vijeće se služi iskustvima zemalja Evropske Unije (*best practices*), posebno onih s dužom tradicijom tržišne privrede, te nastoji na odgovarajući način, uvažavajući postavke pravnog sistema Bosne i Hercegovine predlagati rješenja koja zaštitu tržišne konkurencije čine suvremenom i usporedivom s standardima pravne zaštite Evropske Unije.

2.2. Podzakonski akti

Radi definiranja odredbi Zakona o konkurenciji, koji pojedine oblike narušavanja tržišne konkurencije uređuju samo na načelnoj osnovi, bilo je neophodno da Konkurencijsko vijeće, donese sljedeće podzakonske akte:

- Odluka o grupnom izuzeću sporazuma o osiguranju - «Službeni glasnik BiH», 15/06;
- Odluka o grupnom izuzeću sporazuma o prenos tehnologije, licenci i know how - «Službeni glasnik BiH», 15/06;
- Odluka o proceduri oslobađanja odnosno ublažavanja od kazne (leniency policy) - «Službeni glasnik BiH», 15/06;
- Odluka o grupnom izuzeću sporazuma o distribuciji i servisiranju motornih vozila - «Službeni glasnik BiH», broj 16/06;
- Nova Odluka o utvrđivanju relevantnog tržišta - «Službeni glasnik BiH», broj 18/06;
- Odluka o definiranju kategorija dominantnog položaja - «Službeni glasnik BiH» broj 18/06;

- Odluka o grupnom izuzeću sporazuma između privrednih subjekata koji djeluju na različitim nivoima proizvodnje odnosno distribucije (vertikalni sporazumi) - «Službeni glasnik BiH», broj 18/06;
- Odluka o visini administrativnih taksi u vezi sa procesnim radnjama pred Konkurencijskim vijećem - «Službeni glasnik BiH», broj 30/06;
- Odluka o bližem definiranju načina periodičnog plaćanja kazne - «Službeni glasnik BiH», broj 31/06;
- Naredba o uplatnom računu za uplatu administrativnih taksi u vezi sa procesnim radnjama pred Konkurencijskim vijećem - «Službeni glasnik BiH», broj 44/06;
- Pravilnik o vođenju Registra koncentracija -«Službeni glasnik BiH», broj 90/06;
- Odluku o načinu podnošenja prijave i kriteriji za ocjenu Koncentracije privrednih subjekta - «Službeni glasnik BiH», broj 96/06.

Navedenim odlukama osigurano je, s jedne strane detaljnije uređenje pojedinih odredbi Zakonom o konkurenciji, što omogućuje pravilnu primjenu istih u praksi, kao i pravnu sigurnost privrednim subjektima koji su stranke u postupcima pred Konkurencijskim vijećem, jer će lakše razumijeti i prepoznati kriterije, standarde i način na koji postupaju Konkurencijsko vijeće u konkretnim slučajevima. Svi doneseni podzakonski akti su velikim dijelom usklađeni s pravnim naslijeđem EZ-a (*acquis communautaire*).

2.3. Interni akti Konkurencijskog vijeća

U cilju definiranja Unutrašnje organizacije Konkurencijskog vijeća, kao nezavisnog i samostalnog tijela, čiji rad i djelovanje je uslovljeno važećim propisima doneseni su novi interni akti:

- Pravilnik o Unutrašnjoj organizaciji i sistematizaciji Konkurencijskog vijeća;
- Poslovnik o radu Konkurencijskog vijeća;
- Pravilnik o internim procedurama stvaranja i evidentiranja obaveza i načinu potpisivanja finansijske dokumentacije;
- Pravilnik o postupku utvrđivanja direktnog sporazuma sa pojedinačnim dobavljačima, davateljem roba, usluga i izvođačem radova;
- Pravilnik o utvrđivanju podkriterija za određivanje najpovoljnije ponude i načina vrijednovanja ekonomski najpovoljnije ponude;
- Pravilnik o upotrebi računala i zaštita podataka;
- Pravilnika o pravljenju kopija podataka i zaštita istih;
- Pravilnik (Program) o obrazovanju i usavršavanju članova Konkurencijskog vijeća, državnih službenika i uposlenika;
- Pravilnik o internoj kontroli;
- Etički kodeks.

3. Unutrašnja organizacija i sistematizacija Konkurencijskog vijeća

Konkurencijsko vijeće je formirano, dana 01. maja 2004. godine, kao samostalno i nezavisno tijelo sa sjedištem u Sarajevu. Zakonom o konkurenciji je propisana Unutrašnja organizacija Konkurencijskog vijeća, uslovi za imenovanje, razrješenje i trajanje mandata predsjednika i članova Konkurencijskog vijeća, donošenja odluka kao i nadležnosti.

Pravilnikom o Unutrašnjoj organizaciji i sistematizaciji Konkurencijskog vijeća je detaljno uređeno izvršavanje poslova, ovlasti i odgovornosti državnih službenika u obavljanju poslova, ukupan broj državnih službenika i uposlenika, naziv i raspored poslova s opisom poslova, kao i druga pitanja vezana za organizaciju i upravljanje od značaja za rad Konkurencijskog vijeća.

Ovim Pravilnikom je predviđeno ukupno 22 zaposlena (6 članova Konkurencijskog vijeća i 16 zaposlenih u Stručnoj službi -12 državnih službenika i 4 uposlenika), što je povećanje u odnosu na 2005. godinu za 4 državna službenika.

Prema Pravilniku u radni odnos je primljeno 6 državnih službenika (od strane Agencije za državnu službu BiH) nakon provedene procedure javnog konkursa u skladu sa Zakonom o državnoj službi u institucijama BiH. Krajem 2006. godine na zahtjev Konkurencijskog vijeća Agencija za državnu službu je raspisala javni konkurs za prijem dva državna službenika za organizacionu jedinicu Konkurencijskog vijeća – Ured za konkurenciju Mostar, i očekuje se završetak procedure početkom 2007. godine.

Poslovníkom o radu je utvrđen način rada, odlučivanja i druga pitanja u vezi s radom i održavanjem sjednica Konkurencijskog vijeća.

U cilju unapređenja kvaliteta rada i poboljšanja efikasnosti te pripreme sjednica održava se Stručni kolegij Konkurencijskog vijeća. Na Stručnom kolegiju se raspravlja o toku postupaka po predmetima, svim pitanjima u vezi pripreme sjednica, kao i o svim tekućim pitanjima koja se odnose na upravljanje i način rada Konkurencijskog vijeća.

3.1. Članovi Konkurencijsko vijeće

Konkurencijsko vijeće se sastoji od šest članova s mandatom od šest godina. Članovi Konkurencijskog vijeća se biraju iz reda priznatih stručnjaka iz odgovarajućih područja i imaju status jednak upravnim sudijama.

Članovi Konkurencijskog vijeća se zadužuju za upravljanje postupkom po pojedinim predmetima, pružanje stručne pomoći u vođenju postupka i donošenje odluka na sjednicama Konkurencijskog vijeća.

Vijeće ministara Bosne i Hercegovine, na prijedlog Konkurencijskog vijeća, imenuje svake godine predsjednika iz reda članova Konkurencijskog vijeća na period od jedne godine. Predsjednik upravlja, zastupa i predstavlja Konkurencijsko vijeće, saziva i predsjedava sjednicama i obavlja poslove u skladu sa Zakonom o konkurenciji i drugim pozitivnim propisima.

3.2. Stručna služba Konkurencijskog vijeća

Stručna služba Konkurencijskog vijeća obavlja, upravne, stručne i administrativne poslove zaštite tržišne konkurencije za potrebe Konkurencijskog vijeća. Stručna služba Konkurencijskog vijeća je osnovna organizacijska jedinica koja ima organizacijske jedinice izvan sjedišta odnosno Ured za konkurenciju u Banja Luci i Mostaru (po dva državna službenika).

U djelokrug poslova Stručne službe spada provođenje postupka radi utvrđivanja svih oblika sprječavanja, ograničavanja ili narušavanja tržišne konkurencije (ocjene sporazuma poduzetnika, ocjene koncentracija poduzetnika i utvrđivanje zloupotreba dominantnog položaja poduzetnika (5 državnih službenika koji imaju visoku stručnu spremu - diplomirani pravnici i diplomirani ekonomisti).

4. Budžet Konkurencijskog vijeća

Financijska sredstva za obavljanje poslova iz djelokruga Konkurencijskog vijeća osiguravaju se isključivo iz Budžeta institucija Bosne i Hercegovine. Budžet Konkurencijskog vijeća za 2006. godinu nakon rebalansa je iznosio 952.800,00 KM.

Realizacija budžeta Konkurencijskog vijeća za 2006. godinu je oko 88,0% (racionalnim trošenjem na nekim pozicijama su ostvarene odgovarajuće uštede novčanih sredstava - službena putovanja, troškovi telefona, održavanje prostora, reprezentacija itd).

4.1. Radni prostor Konkurencijskog vijeća

Konkurencijsko vijeće za rad i djelovanje koristi zakupljeni prostor u Sarajevu i Banja Luci (oko 320 m²) i za ovu namjenu izdvojeno je iz Budžeta oko 93.000,00 KM.

Za rad Konkurencijskog vijeća u 2007. godini bit će neophodno osigurati dodatni prostor u Sarajevu i Mostaru (Ured za konkurenciju Mostar) radi povećanja broja zaposlenih.

4.2. Nabavka tehničke opreme

Konkurencijsko vijeće dio tehničke opreme i namještaja je dobilo donacijom od strane EU Projekta («Jedinstveni ekonomski prostor II»), preuzimanjem iz Ureda za konkurenciju i zaštitu potrošača Banja Luka i Mostar, a dio opreme je nabavljen iz budžeta Konkurencijskog vijeća.

Konkurencijsko vijeće tehničku opremu za 2006. godinu je nabavilo u skladu sa procedurom predviđenom Zakonom o javnim nabavkama Bosne i Hercegovine u iznosu od 19.200,00 KM. Raspoloživa tehnička oprema i namještaj osigurava optimalne uslove za postojeći broj zaposlenih.

4.3. Administrativne takse i novčane kazne

Administrativne takse se naplaćuju za procesne radnje koje obavlja Konkurencijsko vijeće (npr. rješenja po prijavama namjere koncentracije, rješenja o ocjenama usklađenosti sporazuma s odredbama Zakona, o utvrđivanju izuzeća sporazuma, o ocjeni dopuštenosti koncentracije), kao i za davanje stručnih mišljenja, prijave, zahtjeve i slično.

Visina administrativnih taksi je utvrđena Odlukom o visini administrativnih taksi u vezi sa procesnim radnjama pred Konkurencijskim vijećem («Sl. glasnik BiH», broj 30/06), donesenom od strane Vijeća ministara BiH, na osnovu Zakona o konkurenciji, a na prijedlog Konkurencijskog vijeća.

Zakonom o konkurenciji je utvrđeno da Konkurencijsko vijeće može izreći novčane kazne privrednom subjektu u rasponu od 1%-10% njihovog ukupnog prihoda za kršenje odredbi Zakona o konkurenciji, kao i novčane kazne za odgovorne osobe u privrednim subjektima.

Prihodi od administrativnih taksi i novčanih kazni koje naplaćuje Konkurencijsko vijeće u cijelosti je prihod budžeta institucija Bosne i Hercegovine, i u 2006. godinu je ostvareno:

| Administrativne takse | Novčane kazne | Ukupno |
|------------------------------|----------------------|----------------|
| 95.750,00 KM | 725.000,00 KM | 820.750,00 KM. |

U 2006. godini Konkurencijsko vijeće je izreklo tri novčane kazne u ukupnoj vrijednosti od 725.000,00 KM, dok je iznos administrativnih taksi 95.750,00 KM, što predstavlja ukupno 820.750,00 KM. Ukupan iznos navedenih prihoda je u zakonom predviđenom roku uplaćen u Budžet institucija Bosne i Hercegovine.

5. Osnovne aktivnosti Konkurencijskog vijeća

Konkurencijsko vijeće u skladu sa Zakonom o konkurenciji ima isključive ovlasti u zaštiti i promociji tržišne konkurencije u Bosni i Hercegovini.

Ovim Zakonom su utvrđena tri ključna oblika djelovanja privrednih subjekata kojima se može spriječiti, ograničiti ili narušiti tržišna konkurencija - zabranjeni sporazumi, zloupotreba dominantnog položaja i zabranjene koncentracije. Djelokrug rada Konkurencijskog vijeća u užem smislu obuhvaća slijedeća osnovna područja:

- ocjene sporazuma privrednih subjekata;
- sprječavanje i otklanjanje zloupotreba dominantnog položaja jednog ili više privrednih subjekata;
- kontrola koncentracija privrednih subjekata.

Pored usvojenih podzakonskih i internih akata (poglavlje 2.2. i 2.3. ovoga Izvještaja) djelovanja Konkurencijsko vijeće su bila usmjerena na pripremanje i donošenje odluka za ukupno 26 predmeta, kao i donošenje 14 stručnih mišljenja na zahtjeve dostavljene od privrednih subjekata, državnih tijela i institucija (Tablica 1.).

Konkurencijsko vijeće je u 2006. godini održalo 23 sastanaka Stručnog kolegija sa 172 tačke dnevnog reda i 18 sjednica Konkurencijskog vijeća sa ukupno 141 tačkom dnevnog reda.

| Klasifikacija predmeta | Završeni | U postupku | Ukupno | Postotak završenih |
|------------------------------------------------------|-----------|------------|-----------|--------------------|
| Zabranjeni sporazumi privrednih subjekata | 2 | 0 | 2 | 100% |
| Zloupotreba dominantnog položaja privrednog subjekta | 2 | 0 | 2 | 100% |
| Koncentracija privrednih subjekata | 14 | 8 | 22 | 63,64% |
| Stručna mišljenja | 14 | 1 | 15 | 93,33% |
| Ostalo | 5 | 0 | 5 | 100,0% |
| UKUPNO: | 37 | 10 | 46 | 80,43% |

Postotak izvršenja predmeta ukazuje na visok stepen ažurnosti Konkurencijskog vijeća, što je rezultat efikasnog i stručnog rada Stručne službe i profesionalnog statusa članova Konkurencijskog vijeća što je omogućilo promptno održavanje sjednica Konkurencijskog vijeća

Svi predmeti (na osnovu zahtjeva, prijave) odnosno stručna mišljenja zaprimljeni u 2006. godini su blagovremeno uzeta u razmatranje i isti rješavani, u skladu sa propisanom procedurom, u predviđenom zakonskom roku.

5.1. Zabranjeni sporazumi privrednih subjekata / Zloupotreba dominantnog položaja

- Doneseno Rješenje (broj: 01-01-76-31/05 dana 19. aprila 2006. godine) kojim se odbija zahtjev po prijavi International Advertising Association-Chapter za Bosnu i Hercegovinu protiv TV OBN, radi povrede člana 4. stav (1) tačka d) Zakona o konkurenciji odnosno narušavanja slobodne tržišne konkurencije zaključivanjem sporazuma u kojima TV OBN primjenjuje različite uslove za istovjetne transakcije s drugim privrednim subjektima, dovodeći ih u neravnotežan položaj u odnosu na konkurenciju, kao neosnovan.
- Doneseno Rješenje (broj: 01-04-26-002-14-II/06 dana 22. novembra 2006. godine) po zahtjevu za pokretanje postupka protiv Skupštine grada Banja Luka podnesenog od poduzeće za proizvodnju i promet roba i usluga «Flor» d.o.o. Čelinac Gornji – Babići, općina Čelinac, kojim je utvrđeno da Skupština grada Banja Luka, u smislu člana 2.

Zakona o konkurenciji, kao tijelo lokalne samouprave, neposredno utiče na tržište tako što je svojom Odlukom o izmjenama i dopunama Odluke o grobljima i pogrebnoj djelatnosti («Službeni glasnik grada Banja Luka», broj 02/05) omogućila dominantni položaj ODKJP «Gradsko groblje» Banja Luka, čime je u smislu člana 4. stav (1) tačka b) Zakona o konkurenciji spriječila, ograničila i narušila tržišnu konkurenciju na relevantnom tržištu usluga prijevoza umrlih osoba i pripreme umrlih osoba za sahranjivanje, na području grada Banja Luka.

Rješenjem je nalaženo Skupštini grada Banja Luka da u roku od 6 (šest) mjeseci od dana prijema odnosno od dana objave ovoga Rješenja, izmjeni ili ukine član 1. Odluke o izmjenama i dopunama Odluke o grobljima i pogrebnoj djelatnosti («Službeni glasnik grada Banja Luka», broj 02/05), u cilju omogućavanja drugim privrednim subjektima, koji se bave pogrebnom djelatnosti, da imaju ravnopravan pristup na relevantno tržište usluge prijevoza umrlih osoba i pripreme umrlih osoba za sahranjivanje na području grada Banja Luka.

5.2. Koncentracija privrednih subjekata

- Doneseno Rješenje (broj: 01-01-26-360-39/06 dana 14. jula 2006. godine) kojim se ocjenjuje kao dopuštena koncentracija na tržištu bankovnih i finansijskih usluga Bosne i Hercegovine po Prijavi namjere koncentracije na osnovu ugovora o poslovnom udruživanju zaključenog dana 12. juna 2005. godine između UniCredit Italiano S.p.A., Milano, Republika Italija (UCI) i Bayerische Hypo und Vereinsbank AG., Minhen, Savezna Republika Njemačka. Predmetne banke djeluju na bankovnom i finansijskom tržištu usluga u Bosni i Hercegovini preko subsidijarnih društava - UniCredit Zagrebačka banka, UPI Poslovni sistem, Zana BiH, HVB Central Profit Banka, HVB leasing CPB, BACA Leasing Nekretnine, Bank Austria Creditanstalt Leasing, Nova Banjalučka Banka itd.
- Doneseno Rješenje (broj: 01-03-26-006-12-II/06 dana 22. septembra 2006. godine) kojim se ocjenjuje dopuštenom koncentracija koja je nastala na relevantnom tržištu bankovnih i finansijskih usluga putem sticanja većinskog udjela u privrednom subjektu LT Gospodarskoj banci d.d Sarajevo, ulica Ferhadija 11, Bosna i Hercegovina, od strane privrednog subjekta Privredne banke Zagreb d.d. Zagrebu, Račkoga 6, Republika Hrvatska.

Radi nepodnošenja Prijave namjere koncentracije u zakonom predviđenom roku izrečena je novčanu kazna Privrednoj banci Zagreb d.d. u visini od 75.000,00 KM.

- Doneseno Rješenje (broj: 01-04-26-009-7-II/06 dana 12. oktobra 2006. godine) kojim se ocjenjuje dopuštenom koncentracija koja nastaje na tržištu specijalizovanih (generičkih) farmaceutskih proizvoda u Bosni i Hercegovini kao rezultat preuzimanja kupovinom većine dionica putem javne ponude PLIVE d.d. Zagreb, ulica grada Vukovara 49, Republika Hrvatska, od strane Bar Laboratories Europe B.V.i.o. Amsterdam, Rokin 55, Kraljevina Nizozemska.
- Doneseno Rješenje (broj: 01-03-26-620-19-I/05 dana 12. oktobra 2006. godine) kojim se ocjenjuje dopuštenom koncentracija koja je nastala na relevantnom tržištu filtera (za ulje i zrak) za motorna vozila preuzimanjem odnosno sticanjem većinskog udjela u privrednom subjektu «Unico Filter» Fabrika filtera d.d. Tešanj, od strane privrednog subjekta MANN+HUMMEL Auslandsbeteiligungsgesellschaft mbH, Ludwigsburg, Savezna Republika Njemačka.

- Doneseno Rješenje (broj: 01-01-26-007-20-II/06 dana 26. oktobra 2006. godine) kojim se ocjenjuje dopuštenom koncentracija nastala na relevantnom tržištu bankovnih i finansijskih usluga Bosne i Hercegovine koja je nastala sticanjem većinskog vlasničkog udjela u privrednom subjektu UPI Banka d.d. Sarajevu od strane privrednog subjekta Intesa Holding International S.A. Luksemburgu.

Zbog nepodnošenja Prijave namjere koncentracije u zakonom predviđenom roku, izrečena je novčana kazna privrednom subjektu Intesa Holding International S.A., Luxemburg u visini od 250.000,00 KM.

- Doneseno Rješenje (broj: 01-02-26-010-8-II/06 dana 22. novembra 2006. godine) kojim se ocjenjuje dopuštenom koncentracija koja nastaje na relevantnom tržištu proizvodnje i prodaje specijaliziranih (generičkih) farmaceutskih proizvoda u Bosni i Hercegovini kao rezultat preuzimanja privrednog subjekta Hemofarma a.d. Vršac, Republika Srbija – Hemofarm d.o.o. Banja Luka, Bosna i Hercegovina od strane privrednog subjekta STADA Arzneimittel AG, Stadastrasse 2-18, Bad Vilbal, Savezna Republika Njemačka, kupovinom većine njenih dionica putem javne ponude odnosno najmanje 67,0% vlasničkog udjela u privrednom subjektu Hemofarm d.d. Vršac–Hemofarm d.o.o. Banja Luka.
- Doneseno Rješenje (broj: 01-02-26-17-9-II/06 dana 15. decembra 2006. godine) kojim se ocjenjuje dopuštenom koncentracija nastala na relevantnom tržištu bankovnih i finansijskih usluga Bosne i Hercegovine putem sticanja većinskog vlasničkog udjela u privrednom subjektu Razvojna banka Jugoistočne Europe d.d. Banja Luka, Banja Luka od strane privrednog subjekta Nova Ljubljanska banka d.d., Ljubljana, Republika Slovenija.

Zbog nepodnošenja Prijave namjere koncentracije u zakonom predviđenom roku, izričena je novčana kazna privrednom subjektu Nova Ljubljanska banka d.d. Ljubljana u visini od 400.000,00 KM.

- Doneseno Rješenje (broj: 01-04-26-015-8-II/06 dana 22. decembra 2006. godine) kojim se ocjenjuje dopuštenom koncentracija koja je nastala na relevantnom tržištu usluga osiguranja u Federaciji Bosne i Hercegovine i Brčko Distriktu Bosne i Hercegovine kao rezultat pripajanja privrednog subjekta Sunce osiguranje d.d. Sarajevo, Azize Šaćirbegović 13., privrednom subjektu Bosna osiguranje d.d. Sarajevo, Azize Šaćirbegović 10. Pravni temelj koncentracije je Odluka o reorganizaciji privrednog društva Sunce osiguranje privrednom društvu Bosna osiguranje usvojena od učesnika koncentracije, dana 12.septembra 2006. godine.
- Doneseno Rješenje (broj: 01-01-26-014-47-II/06 dana 22. decembra 2006. godine) kojim se ocjenjuje dopuštenom koncentracija nastala na relevantnom tržištu prodaje proizvoda motornih goriva i maziva Bosne i Hercegovine putem sticanja kontrole, odnosno dominantnog uticaja u privrednom subjektu Energopetrol d.d. Sarajevo, Bosna i Hercegovina od strane privrednog subjekta INA industrija nafte d.d. Zagreb, Republika Hrvatska i privrednog subjekta MOL Hungarian Oil and Gas Plc., Budimpešta, Republika Mađarska (Konzorcij INA-MOL). Pravni temelj predmetne koncentracije je Ugovor o dokapitalizaciji privrednog subjekta Energopetrol od strane privrednog subjekta MOL Budimpešta i privrednog subjekta INA Zagreb-Konzorcij INA-MOL, zaključen dana 08. septembra 2006. godine

5.3. Predmeti u postupku

- Podnesena Prijava namjere koncentracije (broj: 01-03-26-018-II/06 dana 01. novembra 2006. godine) od strane privrednog subjekta Mittal Steel company N.V. Rotterdam,

Kraljevina Nizozemska, namjeravanim preuzimanjem privrednog subjekta Arcelor S.A., Luksemburg od strane podnosioca prijave.

- Podnesena prijava namjere koncentracije (broj: 01-05-26-019-II/06 dana 07. novembra 2006. godine) od strane privrednog subjekta Banca Intesa S.p.A. Milano, Italija, namjeravanim preuzimanjem privrednog subjekta Sanpaolo IMI S.p.A. Torino, Italija od strane podnosioca prijave.
- Podnesena prijava namjere koncentracije (broj: 01-05-26-013-3-II/06 dana 15. novembra 2006. godine) od strane privrednog subjekta Danube Foods d.o.o. Sarajevo, Bosna i Hercegovina, namjeravanim preuzimanjem privrednog subjekta Mlijekoprodukt d.o.o. Kozarska Dubica, Bosna i Hercegovina od strane podnosioca prijave.
- Donesen Zaključak o pokretanju postupka (broj: 01-03-026-012-9-II/06 dana 22. novembra 2006. godine) ocjene dopuštenosti koncentracije po Prijavi namjere koncentracije podnesene u smislu člana 16. Zakona o konkurenciji od privrednog subjekta «Fomento de Construcciones y Contrata, S.A.» Španjolska, kojom namjerava steći kontrolu nad «Alpine Mayreder Bau GmbH, Austrija. Postupak u toku.
- Podnesena Prijava namjere koncentracije (broj:01-01-26-020-II/06 dana 24. novembra 2006. godine) od strane privrednog subjekta MAN Aktiengesellschaft, Minhen, Savezna Republika Njemačka, namjeravanim preuzimanjem privrednog subjekta Scania AB, Sodertalje, Kraljevina Švedska od strane podnosioca prijave.
- Podnesena zajednička prijava namjere koncentracije (broj 01-02-26-021-II/06 dana 12. decembra 2006. godine) od strane privrednog subjekta ČEZ a.s. Prag, Češka i privrednog subjekta Mješoviti holding Elektroprivreda RS Trebinje – Matično preduzeće a.d. Trebinje, Bosna i Hercegovina, osnivanjem zajedničkog društva Nove elektrane Republike Srpske d.o.o. Gacko.
- Podnesena Prijava namjere koncentracije (broj: 01-06-26-022-II/06 dana 22. decembra 2006. godine) od strane privrednog subjekta Europapir Sarajevo d.o.o., Bosna i Hercegovina, namjeravanim preuzimanjem privrednog subjekta Hercegtisak d.o.o. Široki brijeg, Bosna i Hercegovina od strane podnosioca prijave.
- Podnesena Prijava namjere koncentracije (broj: 01-06-26-022-II/06 dana 27. decembra 2006. godine) od strane privrednog subjekta Bingo d.o.o. export-import Tuzla, namjeravanim preuzimanjem privrednog subjekta Velepromet – Banovići d.o.o., Banovići, Bosna i Hercegovina od strane podnosioca prijave.
- Podnesena Prijava namjere koncentracije (broj: 01-05-26-024-II/06 dana 28. decembra 2006. godine) od strane privrednog subjekta Zlomreks A.S. Poraj, Republika Poljska, namjeravanim preuzimanjem privrednog subjekta Voestalpine GmbH Linz, Republika Austrija od strane podnosioca prijave.

5.4. Stručna mišljenja

- Dato Mišljenje (broj: 01-01-26-548-1-I/05 dana 19. januara 2006. godine) na prijavu privrednog subjekta STROM telecom, s.r.o., Prag 4 Michelska, Republika Češka koje se odnosi na prijavu namjere koncentracije u vezi sa članom 12. Zakona o konkurenciji.
- Dato Mišljenje (broj:01-01-50-589-2-I/06 dana 28. jula 2006. godine) da je Nacr (podnesen od strane Regulatorne komisije za električnu energiju u Federaciji Bosne i

Hercegovine) Pravilnika o kvalificiranom kupcu Regulatorne komisije za električnu energiju u Federaciji Bosne i Hercegovine usaglašen s odredbama Zakona o konkurenciji.

- Dato Mišljenje (broj:01-01-50-738-I/06 dana 29. septembra 2006. godine) da je Prijedlog (podnesen od strane Regulatorne komisije za električnu energiju Republike Srpske) Pravilnika o sticanju statusa kvalificiranog kupca Regulatorne komisije za električnu energiju Republike Srpske usaglašen sa odredbama Zakona o konkurenciji.
- Dato Mišljenje (broj: 01-01-26-1017-1-I/06 dana 22. novembra 2006. godine) na zahtjev dostavljen od «FIMA Int. d.o.o.» Društvo sa ograničenom odgovornošću za poslovanje s vrijednosnicama, Sarajevo, Topal Osman paša 18a, koje se odnosi na pojašnjenje nekih pojmova i kategorija koncentracije privrednih subjekata u vezi sa čl. 12. i 14. Zakona o konkurenciji.
- Dato Mišljenje (broj: 01-01-50-757-1-I/06 dana 22. novembra 2006. godine) na zahtjev dostavljen od Agencije za javne nabavke Bosne i Hercegovine, Radićeva 8, Sarajevo, kojim je navedeno da relevantno tržište telekomunikacionih usluga ne ispunjava uslove tržišne konkurencije u Bosni i Hercegovini.
- Dato Mišljene (broj: 01-01-26-1109-1-I/06 dana 15. decembra 2006. godine) na zahtjev Agencije za bankarstvo Federacije Bosne i Hercegovine, Koševo 3, Sarajevu, koje se odnosi na neke kategorije koncentracije privrednih subjekata /banaka u vezi sa čl. 12. i 14. Zakona o konkurenciji.
- Dato Mišljena (broj: 01-01-26-1132-2-I/06 dana 22. decembra 2006. godine) na prijavu dostavljen od strane JP HP Hrvatske telekomunikacija d.o.o. Mostar kojim namjeravano pripajanje privrednog subjekta HT MOBilne d.d. Mostar i gopodarskom subjektu JP HP Hrvatske telekomunikacija d.o.o. Mostar ne smatra koncentracijom, u smislu člana 12. Zakona o konkurenciji.

5.5. Ostalo

- Zahtjev Udruženja potrošača «APEMA» Obala Kulina bana 39/II (broj: 01-06-26-001-6 - II/06 dana 03. marta 2006. godine) za pokretanje postupka protiv Regulatorne agencije za komunikacije Bosne i Hercegovine, Sarajevo, privrednog subjekta BH Telecom d.d. Sarajevo i privrednog subjekta HT d.o.o. Mostar radi kršenja Zakona o konkurenciji za pružanje usluga javne fiksne telefonije, Konkurencijsko vijeće nije razmatralo jer je stranka odustala od zahtjeva.
- Zahtjev /prijavu Aquarius d.o.o. Banja Luka, Isidore Sekulić 22 (broj: 01-05-26-004-II/06 dana 11. aprila 2006. godine) za pokretanje postupka utvrđivanja monopolističkog ponašanja od strane Agencije Media United Konkurencijsko vijeće nije razmatralo jer je stranka odustala od zahtjeva, u smislu člana 31. Zakona o konkurenciji.
- Zahtjev za pokretanje postupka podnesen od privrednog subjekta «Holand Company» (broj:01-05-26-008-II/06 dana 15. juna 2006. godine) radi utvrđivanja zabranjenih konkurentskih djelovanja protiv Kantona Sarajevo, Vlade Kantona Sarajevo i Ministarstva prometa i komunikacija Kantona Sarajevo Konkurencijsko vijeće nije razmatralo jer je stranka odustala od zahtjeva, u smislu člana 31. Zakona o konkurenciji.
- Konkurencijsko vijeće po Prijavi namjere koncentracije (broj: 01-06-26-011-II/06 dana 27. jula 2006. godine) privrednog subjekta PLIVE d.d. Zagreb, Ulica grada Vukovara 49, Republika Hrvatska i privrednog subjekta Actavis Group hf Rejkjavik, Reykjavikurvegi

76-78, Island, je prihvatilo zahtjev Actavisa o povlaćenju Prijave namjere predmetne koncentracije.

- Podnesena Prijava namjere koncentracije (broj: 01-05-26-013-II/06 dana 12. septembra 2006. godine) od strane privrednog subjekta Somboled a.d. Sombor, Gakovački put bb, Republika Srbija, o namjeravanom preuzimanju privrednog subjekta Mlijekoprodukt Kozarska d.o.o. Kozarska Dubica, Bosna i Hercegovina Konkurencijsko vijeće nije razmatralo jer je stranka odustala od zahtjeva, u smislu člana 31. Zakona o konkurenciji.
- Donesen Zaključak (broj: 01-06-26-005-20-II/06 dana 15. decembra 2006. godine) kojim se obustavlja postupak pokrenut po Zaključku o pokretanju postupka za ocjenu Prijave namjere koncentracije između privrednog subjekta CBS Bank d.d., Sarajevu, Džidžikovac broj 1, i Tuzlanske banke d.d., Tuzli, Maršala Tita 3. Analizom vlasničke strukture je utvrđeno da se radi o unutrašnjoj reorganizaciji privrednih subjekata unutar grupacije Nove Ljubljanske banke i radi toga nije postojala obaveza prijave namjere koncentracije na osnovu člana 16., a u smislu člana 12. Zakona o konkurenciji.
- Donesen Zaključak (broj: 01-02-26-003-15-II/06 dana 15. decembra 2006. godine) kojim se obustavlja postupak pokrenut po Zaključku o pokretanju postupka za ocjenu Prijave namjere koncentracije privrednog subjekta LHB Banka d.d. Banja Luka, Milana Tepića broj 4., i privrednog subjekta Razvojna banka Jugoistočne Europe d.d., Banja Luka - grupa Nova Ljubljanska banka, Kralja Petra I Karađorđevića broj 85a. Analizom vlasničke strukture je utvrđeno da se radi o unutrašnjoj reorganizaciji privrednih subjekata unutar grupacije Nove Ljubljanske banke i radi toga nije postojala obaveza prijave namjere koncentracije na osnovu člana 16., a u smislu člana 12. Zakona o konkurenciji.
- Donesen Zaključak (broj: 01-06-26-016-9-II/06 dana 22. decembra 2006. godine) kojim se obustavlja postupak pokrenut po Zaključku o pokretanju postupka po službenoj dužnosti za ocjenu koncentracije između privrednog subjekta Banka Domžale d.d. Domžale, Ljubljanska 62, Republika Slovenija, i privrednog subjekta CBS Bank d.d., Sarajevo, Džidžikovac 1. Analizom vlasničke strukture je utvrđeno da se radi o unutrašnjoj reorganizaciji privrednih subjekata unutar grupacije Nove Ljubljanske banke i radi toga nije postojala obaveza prijave namjere koncentracije na osnovu člana 16. a u smislu člana 12. Zakona o konkurenciji.

6. Ostala djelovanja Konkurencijskog vijeća

6.1. Promotivni Program «Competition Advocacy»

Važan aspekt rada i djelovanja Konkurencijskog vijeća u 2006. godini je razvoj tzv. "kulture tržišne konkurencije", tj. provođenja aktivne politike promocije tržišne konkurencije, odnosno podizanja nivoa svijesti i znanja te informiranosti privrednih subjekata, vladinih i drugih državnih tijela, sindikata, potrošača, pravosuđa, te šire javnosti o važnosti i ulozi politike i prava tržišne konkurencije za daljnji razvitak tržišne ekonomije u zemlji, te njene uloge u podizanju konkurentnosti privrednih subjekata.

U 2006. godini nastavljen je i program «Competition Advocacy» (započet u 2005. godini), kojim je prezentirano zakonodavstvo i politika tržišne konkurencije u Bosni i Hercegovini. U sklopu ovog Programa članovi Konkurencijskog vijeća, u saradnji sa EU Projektom aktivno su sudjelovali u radu niza seminara održanih u Vanjskotrgovinskoj komori BiH u Sarajevu i entitetskim privrednim komorama u Mostaru i Banja Luci s ciljem promoviranja konkurencijskog prava i prakse s ciljem upoznavanje poslovne zajednice s propisima o tržišnoj konkurenciji, postupcima i djelovanjima na tržištu konkurencije.

Konkurencijsko vijeće je pripremio i publikaciju pod nazivom «Zbirka propisa Konkurencijskog vijeća», koja će biti distribuirana poslovnoj zajednici, udruženjima privrednika, privrednim komorama, fakultetima i drugim institucijama Bosne i Hercegovine.

Promovisanje Konkurencijskog vijeća Bosne i Hercegovine je ostvareno i kontinuiranim davanjem intervjua, informacija domaćim i stranim medijima (elektronskim i štampanim).

U tom cilju je ažurirana ranije uspostavljena web stranica Konkurencijskog vijeća (www.bihkonk.gov.ba) na kojoj se mogu pronaći svi propisi i informacije iz oblasti djelovanja Konkurencijskog vijeća (usvojene odluke, rješenja, mišljenja, zaključci i sl.).

6.2. Saradnja s međunarodnim institucijama i organizacijama

Djelovanja Konkurencijskog vijeća su bila usmjerena na uspostavljanje, kao i na unapređenje saradnje s međunarodnim institucijama i organizacijama, kao što su: ICN (Međunarodna mreža tijela za konkurenciju), OECD (Evropska organizacija za saradnju i razvoj), UNCTAD (Organizacija Ujedinjenih naroda za trgovinu i razvoj) itd. Kontakti s međunarodnim organizacijama i institucijama omogućili su stvaranje i razvijanje efikasne saradnje s tijelima nadležnim za tržišnu konkurenciju što treba osigurati međusobnu razmjenu podataka i brže rješavanje otvorenih pitanja i problema.

Konkurencijsko vijeće s Agencijom za tržišno natjecanje Republike Hrvatske je u martu 2006. godine potpisalo Memorandum o međusobnoj saradnji (pravci saradnje - obrazovanje i razmjena iskustava i podataka itd). Također, Konkurencijsko vijeće je nastavilo razvijati međunarodnu saradnju, prije svega s tijelima nadležnim za zaštitu tržišne konkurenciju zemalja regiona, zemljama kandidatima za članstvo u EU, kao i državama članicama EU.

6.3. Saradnja s domaćim tijelima i institucijama

Djelovanje Konkurencijskog vijeća je bilo usmjereno i na uspostavljanje odnosno unapređivanje saradnje s tijelima (tzv. «sektorski regulatori») u Bosni i Hercegovini, prije svega regulatorima iz energetskih djelatnosti na državnoj i entitetskoj razini, Agencijom za telekomunikacije Bosne i Hercegovine, Agencijama za bankarstvo Federacije BiH i Republike Srpske, udruženjima za zaštitu potrošača itd.

6.4. Obrazovanje zaposlenih u Konkurencijskom vijeću

Obrazovanje zaposlenih je jedna od bitnih djelovanja koja se kontinuirano provodi kroz aktivno sudjelovanje na velikom broju različitih međunarodnih i domaćih seminara, radionica, kao i internim i eksternim tečajevina:

a) Međunarodni seminari /radionice

- sudjelovanje na seminaru u organizaciji OECD RCC održanom u januaru 2006. godine u Budimpešti sa temom «Različiti aspekti prava i politike tržišne konkurencije»;
- sudjelovanje na seminaru u organizaciji OECD RCC održanom u martu 2006. godine u Beču sa temom «Competition Policy»;
- sudjelovanje na radionici u organizaciji OECD RCC održanoj u aprilu 2006. godine u Budimpešti sa temom «Primjena antikartela u praksi»;

- sudjelovanje na seminaru u organizaciji CARDS Regional Project 2003, Republika Italija, Treviso sa temom «Uspostavljanje nezavisnog sudstva i razmjena iskustava u sudskoj prakse i Saradnja sa zemljama Zapadnog Balkanom» održan u maju 2006. godine;
- sudjelovanje na međunarodnoj konferenciji u organizaciji Ministarstva ekonomije, trgovine i energetike i konkurencijskog tijela Republike Albanije i EU CARDS Programa i GTZ sa temom «Konkurencija i državna pomoć», održan u junu 2006. godine.
- sudjelovanje na seminaru u organizaciji Evropske komisije – DG za konkurenciju i GTZ sa temom «Državna pomoć», održanom u junu 2006. godine;
- sudjelovanje na seminaru u organizaciji OECD i Češkog tijela za konkurenciju održanom u septembru 2006. godine sa temom «Zloupotreba dominantnog položaja»;
- sudjelovanje na radionici u organizaciji ICN (Međunarodna mreža tijela za konkurenciju) i nadležnog tijela za konkurenciju Kraljevine Nizozemske sa temom «Zabranjeni sporazumi-karteli», održanoj u novembru 2006. godine;
- sudjelovanje na međunarodnoj konferenciji i sesiji nevladine grupe eksperata za pravo i politike konkurencije u organizaciji Ujedinjenih naroda za trgovinu i razvoj (UNCTAD) u Ženevi, održanoj u oktobru 2006. godini;
- sudjelovanje na Danu konkurencije u organizaciji Povjerenstva za zaštitu konkurencije Republike Bugarske u Sofiji, održanom u novembru 2006. godine;
- sudjelovanje na seminaru u organizaciji OECD RCC sa temom «Odnos između politike konkurenciju regulatornih sektora iz oblasti telekomunikacija», održanom u Budimpešti u decembru 2006. godini;

b) Domaći seminari

- sudjelovanje na seminaru u u organizaciji EU Projekta sa temom «Državna pomoć i zahtjevi za BiH», održanom u Sarajevu u maju 2006. godine;
- sudjelovanje na seminaru u organizaciji Evropske komisije sa temom «Konkurencija i državna pomoć–stupovi tržišne ekonomije», održanom u Sarajevu u maju 2006. godine;
- sudjelovanje na seminaru u organizaciji EU Projekta sa temom «Konkurencijsko pravo i politika», održanom u Neumu u julu 2006. godine;
- sudjelovanje na seminaru u organizaciji EU Projekta sa temom «Transfer tehnologija», održanom na Jahorini u oktobru 2006. godine;
- sudjelovanje na seminaru u organizaciji EU Projekta sa temom «Različiti aspekti koncentracije», održanom na Bjelašnici u decembru 2006. godine;

c) Interni i eksterni seminari i tečajevi

- sudjelovanje na seminarima organiziranim od strane Agencije za državnu službu BiH s temom «Program upravljanja ljudskim resursima», kursevima stranih jezika, informacionih tehnologija, kao i kursevima poznavanja rada na računalu itd;

- sudjelovanje na seminarima u organizaciji Direkcije za Evropske integracije, Vanjskotrgovinske komore BiH, međunarodnih institucija u Bosni i Hercegovini, saveza računovođa;
- subvencioniranje obrazovanja i specijalizacija za zaposlene u potpunosti ili djelimično od strane Konkurencijskog vijeća;
- kontinuirano organiziranje kurseva učenja stranih jezika organiziranih od Konkurencijskog vijeća;
- kontinuirano praćenje i Nabavka stručne literature u cilju uspostavljanja biblioteke.

7. *Zaključno razmatranje*

Konkurencijsko vijeće, u izvještajnom periodu, je realizovalo prioritete utvrđene u Programu rada za 2006. godinu. Glavni prioritet je bio donošenje svih podzakonskih akata utvrđenih Zakonom o konkurenciji, usaglašenih sa zakonodavstvom Evropske unije.

Također, povećanjem broja zaposlenih stvorene su operativne pretpostavke za proširenje obima djelovanja u svim segmentima zaštite tržišne konkurencije, kao i nastavak promotivnog djelovanja s ciljem nastavka upoznavanja poslovne zajednice i privrednika, drugih tijela i institucija o različitim aspektima prava i politike tržišne konkurencije.

Slijedom navedenoga broj zaprimljenih i obrađenih predmeta, iz svih segmenata osnovne djelatnosti utvrđene Zakonom o konkurenciji, je povećan za preko tristo posto u odnosu na 2005. godinu. Značajno povećanje broja dostavljenih predmeta u 2006. godini pokazuje značajno povećanje informiranosti privrednih subjekata (poslovne zajednice) o radu i nadležnostima Konkurencijskog vijeća, kao i stvaranju svijesti da se samo poštivanjem propisa osiguravaju zdravi ekonomski odnosi u sektorima u kojima djeluju.

Tokom 2006. godine tehničku podršku u radu Konkurencijskog vijeća je pružio i EU Projekat «Podrška konkurenciji i državna pomoć u Bosni i Hercegovini».

K.V. broj: 01-01-50-132-I/07

05. februar 2007. godine,

Sarajevo

Predsjednik

Gordan Raspudić